



Márkomeannu

Sámi kultuvra- ja musihkkafestivála/
Samisk kultur- og musikkfestival

PREASSADIEÐÁHUS

Vuosttaš almmuhanbeaivi: Lávvardaga cuoŋománu 24. b. 2010

Šaddá festivála dán jagi

Dál lea čielgan: Šaddá Márkomeannu 2010:s! Festivála lágiduvvo duorastagas, suoidnemánu 29. beaivvis, lávvardahkii, suoidnemánu 31. beaivái, ja fállá konseartaprográmma mii lea devdojuvvon ođđa, nuorra ja fresh'a artisttaiguin. Muhto festiválas ii leat vel produseantavirgi doaimmas.

Márkomeannu ozai juovlamánus ruhtadoarjaga Sámedikkis, Nordlándda fylkkagielddas ja Romssa fylkkagielddas ásahit produseantavirggi festiválii, Sámedikki ja fylkkagielddaid ovttasbargošiehtadusa vuodul. Márkomeannu lea dássáži ožžon ruhtadeami sihke Sámedikkis ja Nordlánddas, muhto vuordá ain vástádusa Romssa fylkkagielddas.

- Mii leat mearridan ahte šaddá festivála 2010s, vaikke produseantavirgi ii leat vel doaimmas. Daid signálaid maid mii leat ožžon Romssa fylkkagielddas, lea ahte sii váldet mearrádusa ovdal 2 vahkku leat gollan. Ja go Sámediggi lea juolludan ruđaid, de válljet mii jáhkkit ahte Romssa fylkkagieldda doalaha ovttasbargošiehtadusa ja ahte sii maid juolludit ruđaid virgái, dadjá Márkomeannu ođđa festiválajođiheaddji, Runar Myrnes Balto.

Ja festivála gal šaddá! Dán jagáš konseartaprográmma lea virkosat go goassige ovdal, mas leat dievva ođđa artisttat maid mii beassat ollu gullat boahtteáiggis. Ruoŋa bealde Sámis boahtá Simon Marainen iežas ođđa joavkkuin ÁRA. Sii leat ollu rámi ožžon maŋŋá sin konseartta Johkamohkkimárkaniin dán dálvvi. Norgga bealde Sámis boahtá Máddji, guhte áiddu lea almmuhan iežas vuosttaš skearru ja geasa lea einnostuvvon čuovgi artista-karriera. Norgga bealde boahtá maddá Jon Iver Eira Tellefsen, guhte iežas fámoláš ja jaskes jienain nuorasmahtii guldaleddjiid go čuojahii ja lávllui nuoraidsearvvi Noereh! álggahančoahkkimis čakčat.

Márkomeannu fállá maid Ánde Somby ođđa joavkku, Sombán. Prográmmas lea maid sámi klassihkkár – Máze Nieiddat. Daddjo ahte Máze Nieiddat ledje dat vuosttaš pop-násttit Sámis, ja čakčat sii loaiddastedje ovttas fas, stuorra illun buohkaide, 30 jagi maŋŋá go ovddit háve čužžo lávddi alde ovttas.

Nu guhká go Márkomeannu lea gávdnon de lea festivála ulbmil leamaš addit nuorra boahtteáiggi sámi artisttaide vejolašvuoda čájehit iežaset. Adjágasa Sara Marielle Gaup ja Lawra Somby juoiggaiga Márkomeannus vuosttaš geardde 2001:s ja 2002:s, rap-lunttat Duolva Duoddaris ja SlinCraze fitne festiválaš MázeMáfain 2005:s, ja Sofia Jannok, guhte dáid áiggiid tine nominašuvnna nominašuvnna maŋŋá Ruoŋa musihkkabirrasis, lei Márkomeannus vuosttaš geardde 2002:s.

Ja festiválajođiheaddjis leat alla vuordámušat dán jagáš konseartaprográmmii.

- Dá lea Sámi boahtteáigi! Mii leat dálvit leamaš miehtá Sámi ohcamin ođđa artisttaid, ja dán jagi oainnat ođđa, nuorra ja fresh'a artisttaid Márkomeannu lávddi alde, loahpaha Myrnes Balto.

Márkomeannu bivdá ahte almmuhanbeaivvi dáhtun váldojuvvo vuhtii.

GULAHALLAN

Runar Myrnes Balto, festiválajođiheaddji, +47 977 73 778, runar@markomeannu.no
Ellen Berit Dalbakk, nubbejođiheaddji, +47 997 96 947, ellen@markomeannu.no